

四庫全書

史部

欽定四庫全書

史部

資治通鑑考異

卷三十五
釋例

詳校官修撰_臣錢 蔡

洗馬_臣王坦修覆勘

總校官庶吉士_臣張能照

校對官編修_臣裴 謙

謄錄監生_臣吳向仁

欽定四庫全書

資治通鑑考異卷二十八

宋司馬光撰

後梁紀上

太祖開平元年正月張顥徐溫殺楊渥親信十餘人

陽歐

史四年正月渥視事陳璠等侍側溫顥擁牙兵入拽璠

等下軒之渥不能止由是失政

按璠等已死於宣州今

紀年

三月甲辰唐帝禪位

四月唐帝御札敕宰臣張文蔚等

備法駕奉迎梁朝而無日五代通錄云四月丁未丁未四月一日也舊唐書云三月甲辰甲辰三月二十七日也唐年補錄三月二十七日甲子降此御札四月戊辰朱全忠即位尤為差誤按此年三月戊寅朔四月丁未朔今從舊唐書

楊凝式諫父涉押傳國寶

陶岳五代史補曰凝式恐事泄即日佯狂時謂之風子按

周世宗實錄凝式本傳仕梁未嘗有疾唐同光初知制誥始以心疾罷明宗時及清泰帝末俱以心恙罷官天福初致仕在洛有風子之號非梁初佯狂也今不取

四月朱全昱責帝滅唐社稷

王仁裕玉堂閑話曰骰子數匝廣王全昱忽駐不擲

顧而白梁祖再呼朱三梁祖動容廣王曰你愛他爾許大官職久遠家族得安否於是大怒擲戲具於階下抵

其益而碎之喑鳴眦睚數目不止
今從王禹偁五代史闕文

戊辰大赦

梁實錄編遺錄薛史唐餘錄
皆不云大赦今從歐陽史

五月契丹阿保機不受代

蘇達吉漢高祖實錄曰契丹
本姓大賀氏後分八族一曰

利皆部二曰乙室活部三曰寶活部四曰納尾部五曰
頗沒部六曰內會難部七曰集解部八曰奚盟部管縣

四十一縣有令八族之長皆號大人稱刺史常推一人
為王建旗鼓以尊之每三年第其名以相代莊宗列傳

曰咸通末其王曰習爾疆土稍大累來朝貢光啓中其
王曰欽德乘中原多故北邊無備遂蠶食諸部達鞏奚

室韋之屬咸被驅役漢高祖實錄唐餘錄皆曰僖昭之
際其王邪律河保機怙彊恃勇距諸族不受代自號天

皇王後諸族邀之請用舊制保機不得已傳旗鼓且曰
我為長九年所得漢人頗衆欲以古漢城領本族率漢

人守之自為一部諸族諾之俄設策復併諸族僭稱皇帝土地日廣大順中後唐武皇遣使與之連和大會於雲州東城延之帳中約為昆弟莊宗列傳又曰及欽德政衰阿保機族盛自稱國王天祐二年大寇我雲中太祖遣使連和因與之面會於雲州東城延入帳中約為兄弟謂曰唐室為賊臣所篡吾以今冬大舉弟助我精騎二萬同收汴洛保機詐諾保機既還欽德以國事傳之賈緯備史云武皇會保機故雲州城結以兄弟之好時列兵相去五里使人馬上持盃往來以展酬酢之禮保機喜謂武皇曰我蕃中酋長舊法三年則罷若他日見公復相禮否武皇曰我受朝命鎮太原亦有遷移之制但不受代則可何憂罷乎保機由此用其教不受諸族之代趙志忠虜庭雜紀云太祖諱億番名阿保謹父諱幹里太祖生而智八部主愛其雄勇遂退其舊主遙輦氏歸本部立太祖為王又云凡立王則衆部酋長皆集會議其有德行功業者立之或災害不生羣牧孳

盛人民安堵則王更不替代苟不然其諸酋長會衆部
別選一名為王故主以蕃法亦甘心退焉不為衆所害
又曰有韓知古韓穎康枚王妻事王郁皆中國人共勸
太祖不受代新唐書載契丹八部名與漢高祖實錄所
載八族名多不同蓋年祀相遠虜語不常耳其實一也
阿保機云我為長九年則其在國不受代久矣非因武
皇之教也今從漢高祖實錄又唐餘錄前云乾寧中劉
仁恭鎮幽州保機入寇仁恭擒其妻兄述律阿鉢由此
十餘年不能犯塞下乃云大順中與武皇會於雲中按
大順在乾寧前乾寧二年仁恭方為幽州節度大順中
未也又武皇謂曰唐室為賊臣所篡吾以今冬大舉此
非大順中事唐餘錄誤也又編遺錄開平二年五月契
丹王阿保機及前國王欽德貢
方物然則於時七部猶在也

晉王與阿保機連和

唐太祖紀年錄太祖以阿保機族
黨稍盛召之天祐二年五月阿保

機領其部族三十萬至雲州東城帳中言事握手甚歡約為兄弟旬日而去留男骨都舍利首領沮橐梅為質約冬初大舉渡河反正會昭宗遇盜而止歐陽史曰梁將篡唐晉王李克用使人聘於契丹阿保機以兵三十萬會克用於雲州東城握手約為兄弟期共舉兵擊梁按雲州之會莊宗列傳薛史皆在天祐四年而紀年錄獨在天祐二年又云約今年冬同收汴洛會昭宗遇盜而止如此則應在天祐元年昭宗崩已前不應在二年也且昭宗遇盜則尤宜興兵討之何故止也按武皇云唐室為賊臣所篡此乃四年語也其冬武皇寢疾蓋以此不果出兵耳今從之

甲午敬翔為宗政院使

實錄四月辛未以翔知宗政院事五月甲午詔樞密院宜改為

崇政院始命翔為院使蓋宗政院之名先已有之至是始併樞密院職事悉歸宗政院耳

六月楚秦彥暉破淮南兵執劉存等

編遺錄天祐四年四月湖南軍陳邵

告捷淮南卽州水陸合勢奔衝其境馬殷出舟師於劉陽江口大破賊黨生擒偽鄂州節度使劉存按薛史梁

紀馬殷奏破淮寇在六月十國紀年吳史劉存攻楚在五月敗在六月楚史亦然編遺錄誤也

七月曲裕卒以其子顥為節度使

諸書不見顥於裕何親按薛史六月丙辰

裕卒七月丙申以靜海行營司馬權知留後曲顥起復為安南都護充節度使既云起復知其子也

九月蜀王即皇帝位

莊宗列傳太祖厭代建自帝於成都年號武成薛史唐餘錄天祐五

年九月建自帝於成都年號武成九國志此年七月即帝位明年改元宋庠紀年通譜天祐四年秋稱帝次年

改元歐陽史十國紀年天復七年九月即位明年改元今從之

二年正月晉王命克寧等立存勗

五代史闕文世傳武皇臨薨以三矢付莊

宗曰一矢討劉仁恭汝不先下幽州河南未可圖也一矢擊契丹且曰阿保機與吾把臂而盟結為兄弟誓復

唐家社稷今背約附梁汝必伐之一矢滅朱溫汝能成善志死無恨矣莊宗藏三矢於武皇廟庭及討劉仁恭

命幕吏以少牢告廟請一矢盛以錦囊使親將負之以

為前驅凱旋之日隨俘馘納矢于太廟伐契丹滅朱氏

亦如之按薛史契丹傳莊宗初嗣世亦遣使告哀賂以

金繒求騎軍以救潞州契丹荅其使曰我與先王為兄

弟兒即吾兒也寧有父不助子耶許出師會潞平而止

廣本劉守光為守文所攻屢求救於晉晉王遣將部兵

五千救之然則於時莊宗未與契丹及守光為仇

也此蓋後人因莊宗成功撰此事以誇其英武耳

五月牛存節救澤州

歐陽史云存節從康懷英攻潞州為行營排陳使晉兵已破夾城存

節以餘兵歸行至天井關聞晉兵攻澤州而救之梁列傳澤州將陷河南尹張宗奭召龍虎統軍牛存節謀之存節帥本軍及右神武羽林等軍往應接上黨回師至天井關即引衆前救澤州薛史亦同按存節若自夾城過歸則先過澤州後至天井關宜得已

周德威退保高平

莊宗列傳朱溫傳云李存璋進攻澤州刺史王班棄城而去澤潞皆平今

取不

張顥徐溫共謀弑弘農王

吳錄顥使紀祥陳暉黎璠孫殷等執渥於寢室弑之不言

徐溫蓋徐鉉為溫諱耳薛史因之而江南別錄有獨用左衙兵事歐陽史云溫顥共遣盜殺渥約分其地以臣於梁按溫與顥分掌牙兵溫若不同謀顥必不敢獨弑渥今從江南別錄十國紀年張顥欲稱淮南留後送款

於梁以淮南易蔡州節制徐溫曰揚州距汴州往返僅
三千里軍府踰月無主必亂不若有所立然後圖之按
顥稱留後則有主矣今不取

鍾泰章斬顥

吳錄作鍾章十國紀
年作鍾泰章今從之

秦彥暉入朗州雷彥恭奔廣陵

梁太祖實錄云丁酉朗
州軍前秦捷彥恭沒溺

於江今
從紀年

十月丁巳帝還大梁

編遺錄在乙卯
今從實錄薛史

三年四月保大節度使李彥博

編遺錄五代史作彥
容今從劉恕廣本

六月乙未朔劉知俊以同州叛

實錄六月庚戌知俊據
本部反削奪官爵興師

討伐編遺錄六月乙未初奏本道軍民遮留尋聞擒使臣及將送鳳翔蓋編遺据奏到之日實錄据削奪之日也

七月商州將吏斬李稠

薛史稠棄郡西奔本州將吏以都牙校李玫權知州事歐陽史

商州軍亂逐其刺史李稠稠奔於岐實錄丙寅陝州奏商州刺史李稠棄郡逃山谷又曰商州將吏以稠驅虜士庶西逃追斬無遺暫令都押衙李玫主州事今從之

王班鎮襄州

薛史作王珏今從實錄

劉玘為亂兵所立逃來

姚顗明宗實錄薛史玘傳皆云翌日受賀衙庭享士伏甲幕下

中筵盡斬其亂將以聞以功為復州刺史按梁祖實錄八月丁酉賜玘王延順物以其違逆將之難來歸編遺

錄斬李洪等敕云始扶劉玘既奔竄以歸明若使玘翌日便斬亂將襄州何由至九月始收復蓋玘脫身歸朝及梁亡入唐妄云斬亂將自誇大史官不能考察從而書之耳

八月楊師厚救晉州破周德威

實錄云殺戮生擒賊將蕭萬通等賊由是棄寨

而遁莊宗實錄云汴軍至蒙沆周德威逆戰敗之斬首二百級師厚退絳州是役也小將蕭萬通戰沒師厚進營平陽德威收軍而退二軍各言勝捷然既殺蕭萬通師厚何肯退保絳州既敗而退宜得復進營平陽德威既戰勝安肯便收軍蓋晉軍實敗走莊宗實錄妄言耳

十一月羅紹威乞骸骨以其子周翰為天雄節度副使

梁功臣列傳朝廷自開創有大事皆降使咨訪紹威有謀慮亦馳簡獻替或中途相遇意互合者十得五六太

祖嘆曰竭忠力一人而已又曰子三人長廷規司農卿尚安陽公主又尚金華公主早卒次周翰起復雲麾將軍充天雄節度留後尋檢校司徒正授魏博節度使亦早卒次曰周敬薛史亦同實錄已亥以司門郎中羅廷規充魏博節度副使知府事仍改名周翰時鄴王紹威病日甚慮以後事故奏請焉莊宗列傳紹威卒溫以其子周翰嗣政莊宗實錄紹威厚率重斂傾府藏以奉溫小有違忤溫即遣人詬辱紹威方懷愧恥悔自弱之謀乃潛收兵市馬陰有覆溫之志而賂溫益厚溫恠其曲事慮蓄奸謀而莫之察乃賜紹威妓妾數人皆承嬖愛未半載溫却召還以此得其陰事內相矛楯薛史又云開平四年夏詔金華公主出家為尼居於宋州玄靜寺蓋太祖推恩於羅氏令終其婦節也唐餘錄歐陽史皆同惟唐莊宗實錄獨異按均帝時趙巖等言羅紹威前恭後倨太祖每深含怒似與此言合然梁祖若間紹威有陰謀必不使周翰更居魏疑後唐史以紹威與梁最

親疾之而載此傳聞之語今從衆書廷規更名周翰亦恐實錄之誤

四年三月夏州殺李彝昌推族父仁福為帥薛史仁福本党項托

跋氏唐末托跋思恭以破黃巢功賜姓故仁福之族亦姓李歐陽史云不知其於思諫為親疎也按仁福諸子皆連彝字則於彝昌必父行也

五月劉守光兼義昌節度使實錄是歲五月以義昌留後劉繼威為義昌節度使

八月又云以守光兼義昌節度使不言置繼威於何處或者復為留後不然守光兼幽滄節度使繼威但為滄州節度使皆不可知今兩存之

十二月楚王殷遣呂師周討辰淑蠻湖湘故事呂師周斬潘金晟於武崗

其年十月十一日辰州宋鄴淑州昌師益一時歸投馬氏今從十國紀年

龐巨昭劉昌魯降于楚

湖湘故事龐巨職本唐末邕容等州防禦使間馬氏令公以征

南步軍指揮使李瓊知桂州軍事領兵士收服嶺外李梧象柳互蒙賀桂等州巨職聞此雄勢謂諸首領曰李瓊有破竹之勢若長驅兵馬此來侵吞吾境其將奈何時容南指揮使莫彥昭對曰李瓊兵馬其勢已雄必然輕敵今欲燒毀城內軍儲且各入山峒拋州城與李瓊候纔入州却依前出諸山峒兵士復攻之堅守旬月之間城內必無軍糧外無救應方可製造攻具再攻擊之必取勝也龐巨職曰吾每至中宵獨占氣象馬氏合當五十餘年興霸湖外苟五十年對壘安知孰非是以憂疑不暇遂至深夜斬莫彥昭於私第明日以其故密走事宜於湖南又曰天復末甲子十有二月容南龐巨職深慮廣南劉巖不道加害於已遂差小吏間路密馳書

欽歸於馬氏是時湖南遣澧州刺史姚彥章領馬步軍八千徑往容南巨曦遂帥萬餘衆歸於馬氏又曰高州防禦使劉昌魯以廣南先主劉巖欲併吞嶺外數召昌魯欲藉沒其家族昌魯知之乃刺血寫書投馬氏具述懸急湖南遂遣捉生指揮使張可球部轄兵馬於界首應接一行三千餘口歸於馬氏今從十國紀年

乾化元年正月丙戌朔日食

李昊屬書丁亥朔日食今從實錄等諸書

五月以劉巖為清海節度使

十國紀年甲辰太祖授陟清海節度使陟復名巖按

薛史僭偽傳云前偽漢劉陟胡賓王劉氏興亡錄高祖巖皇考葬段氏得石版有篆文曰隱台巖因名其三子是先名巖後名陟也吳越備史乾化四年廣帥彭城巖遣陳用拙來使吳錄天祐十四年南海王劉巖自立為漢唐烈祖實錄天祐十四年劉陟僭位改名巖梁太祖實錄乾化元年五月以清海節度副使劉陟為節度使

二年四月以韋戩為潭廣和叶使云廣守淪謝其母弟
巖為軍情所戴七月友珪加劉巖檢校太傅薛史梁未
帝紀貞明五年九月削奪廣州節度使劉巖官爵吳越
備史載制詞亦云彭城巖蓋嗣節度使後復名巖也惟
莊宗實錄同光三年二月廣南劉陟遣何詞來使莊宗
列傳自嗣立至建號皆云劉陟衆說不同未知孰是今
以其首尾名巖故但稱劉巖云

六月劉守光欲稱帝囚王曠史彥羣等

莊宗列傳劉守光傳云朱溫命

偽閭門使王曠供奉官史彥章等使燕冊守光為河北
道採訪使六月汴使至守光令所司定尚父採訪使儀
注取二十四日受冊朱溫傳亦云史彥章莊宗實錄作
史彥璋編遺錄薛史皆作史彥羣今從之又莊宗實錄
三月己丑鎮州遣押衙劉光業至言劉守光凶淫縱毒
欲自尊大請稔其惡以咎之推為尚父乙未上至晉陽

官召張承業謀將等議討燕之謀諸將亦云宜穩其禍
上令押衙戴漢超持墨制及六鎮書如幽州其辭曰天
祐八年三月二十七日天德軍節度使宋瑤振武節度
使周德威昭義節度使李嗣昭易定節度使王處直鎮
州節度使王鎔河東節度使尚書令晉王謹奉冊進盧
龍橫海等軍節度檢校太師兼中書令燕王為尚書令
尚父五月六鎮使至汴使亦集六月守光令有司定尚
父採訪使儀則梁太祖實錄都不言守光事惟編遺錄
云三月壬辰差閤門使王腫受旨史彥瑋齎國禮賜幽
州劉守光甲午守光連上表章率以鎮定既與河東結
懽兼同差使請當道却行天祐年號事守光尋捉王腫
史彥瑋上下一行並囚禁數日後放出按莊宗實錄及
南唐列祖實錄皆云三月辛亥晉王遣戴漢超推守光
為尚父辛亥三月二十七日也壬辰乃三月初八日王
腫等安得已在幽州甲午乃三月十日守光安得上
表云六鎮推臣為尚父編遺錄月日多差誤今不取

八月守光以史彥羣為御史大夫

編遺錄云御史臺副使今從莊宗寶錄

十一月高萬興奏收鹽州

寶錄開平三年六月丁未靈武韓遜奏收復鹽州擒偽刺

史李繼直已下六十二人至此年降高行存下云鹽州與吐蕃党項犬牙相接為二境咽喉之地又烏池鹽醯之利戎羌意未嘗息唐建中初為吐蕃所陷砮其塘而去由是銀夏寧延洎于靈武歲以河南河東山南淮南青徐江浙等道兵士不啻四萬分護其地謂之防秋貞元九年朝政稍暇乃命副元帥渾瑊總兵三萬復取其地建百雉焉自是虜塵乃息邊患遂止唐代革命又復失之今纔動偏師遽收襟要國之右臂瘡疣其息哉李茂貞養子多連繼字開平三年所收似屬鳳翔今又收復云唐革命失之前後必一誤或者開平既得又失之也

二年二月帝至白馬撲殺孫隲等

梁祖實錄云賜自盡今從莊宗實錄

三月棗強卒詐降擊李周彝

莊宗實錄頃之周彝晝寢左右未至其人抽擔擊周

彝首踣於地求兵仗不獲周彝大呼左右救至獲免卒睨周彝曰吾比欲傳刃於朱溫之腹非圖爾也誤矣編

遺錄云時有一百姓來投軍中李周彝收於部伍間謂

周彝曰請賜一劍願先登以收其牆未許間忽然抽茶

擔子揮擊周彝頭上中擔幾仆於地左右擒之先是棗

強邑中遣來令詐降本意欲窺算招討使楊師厚斯人

不能辨乃誤中周彝按此卒從周彝請劍周彝不許而

令負擔豈不知周彝非溫也又帝王與將帥居處侍衛

不同豈容不識而誤中之若本欲殺

楊師厚則似近之今既可疑皆不取

五月單廷珪與周德威遇於龍頭岡

莊宗實錄作牟頭岡今從莊宗列傳

莊宗實錄四月己卯朔周德威擒單廷珪進軍大城莊
薛史及莊宗列傳周德威傳云五月七日擒廷珪十二
日次大城
莊宗從之

六月張厚殺韓建

莊宗實錄九月建遇害今從薛史

七月楊師厚殺潘晏據魏博

梁功臣列傳楊師厚傳云太祖初弃天下郡府乘間

為亂甚衆魏之衙內都指揮使潘晏與大將臧延策趙訓將謀反變有密告者師厚布兵擒捕斬之七月除魏博節度使薛史師厚傳略同今從莊宗列傳朱友珪傳及莊宗實錄

八月龍驤軍潰

莊宗列傳友珪傳云重霸據懷州為亂壯健者團結於輦村將為朱溫雪恥明

宗實錄杜晏球傳云龍驤軍作亂欲入京城已至河陽今按梁祖實錄戊子鄭州奏稱懷州屯駐龍驤騎軍潰

散十一日夜至州南十五里鞏村安下及五鼓分隊逃逸安得據懷州及至河陽事也

十月晉王遇康懷貞於解縣

莊宗同光四年實錄莊宗列傳薛史唐餘錄朱友諒

傳皆云與汴軍遇於平陽大破之今從莊宗天祐九年實錄

三年正月甲子友珪改元鳳厯

莊宗列傳云七日實錄云庚戌友珪祀圓丘改

元今從薛史

二月均王激怒龍驤軍

莊宗列傳朱友真傳及薛史歐陽史末帝紀云左右龍驤都戌

汴友真偽作友珪詔追還洛下莊宗實錄云友珪疑而召之按梁太祖實錄云丙戌東京言龍驤軍準詔追赴西京軍情不肯進發實友珪徵之非友真偽作詔但激怒言坑之耳

三月帝更名鐁久之又名瑱

薛史云貞明中更名瑱諸書皆無年月今因名鐁終

之言

戴思遠為保義節度使

薛史思遠傳云貞明中為邢州留後屬張萬進殺劉繼威命思

遠鎮之按萬進殺繼威在前今從本紀

高行珪使弟行周為質於晉軍

莊宗實錄行周作行溫張昭周太祖實錄云燕

城危賊甲士亡散劉守光召元行欽行欽部下諸將以守光必敗赴召無益乃請行欽為燕帥稱留後行欽無

如之何乃謂諸將曰我為帥亦須歸幽州衆然之行欽以行珪在武州慮為後患乃令人於懷戎掠得其子繫

之自隨至武州行欽謂行珪曰將士立我為留後共汝父子同行先定軍府然後降太原若不從必殺汝子行

珪曰大王委爾親兵遂圖叛逆吾死不能從也其子泣告行珪行珪謂曰元公謀逆何以徇從與爾訣矣行珪城守月餘城中食盡士有飢色行珪乃召集居人謂之曰非不為父老惜家屬不幸軍士乏食可斬予首出降即坐見寧帖行珪為治有恩衆泣曰願出私糧濟軍以死共守乃夜縋其弟行周為質於晉軍乞兵救援周德威命李嗣本李嗣源安金全救武州比至行欽解圍矣嗣源與行珪追躡至廣邊軍行欽帥騎拒戰行珪呼謂行欽曰與公俱事劉家我為劉家守城爾則僭稱留後誰之過也今日之事何勞士衆與君抗衡以決勝負行欽驍猛騎射絕衆報曰可行行周馬足微蹶將踣嗣源躍馬救之搥擊行欽幾墜行欽正身引弓射嗣源中髀貫鞍嗣源拔矢凡八戰控弦七發矢中行欽猶沫血酣戰不解是夜行欽窮蹙固廣邊軍晉兵圍之嗣源遣人告之曰彼此戰將不假言諭事勢可量亟來相見必保功名翌日行欽面縛出降李嗣源酌酒飲之撫其背曰吾

子壯士也養為假子臨敵擒生必有所獲名聞軍中莊宗實錄薛史紀及元行欽傳明宗實錄皆云行欽間行珪降晉帥兵攻之惟周太祖實錄高行周傳云行欽稱留後行珪城守不從然恐行周卒時去燕亡已久行周名位尊顯門生故吏虛美其兄弟故與諸說特異今從衆書

王從珂為李嗣源子

張昭於國初修唐廢帝實錄云廢帝諱從珂明宗皇帝之元子也母

曰宣憲皇后魏氏鎮州平山人中和末明宗徇地山東留戍平山得魏后帝以光啓元年正月二十三日生於外舍屬趙人負盟用兵不息音問阻絕帝甫十歲方得歸宗時明宗為裨將性闊達不能治生曹后亦疏於晝略生計所資惟宣憲而已曹后未有息肩幹家宣室帝與部曲王建立皇甫立代北往來供饋曹后憐之不異所生薛史末帝諱從珂本姓王氏鎮州人也母宣憲皇后魏氏以光啓元年生帝於平山景福中明宗為武皇

騎將略地至平山遇魏氏虜之帝時年十餘歲明宗養為己子劉昫取廢帝錄以為明宗即位後不立從珂而欲立從榮從榮死傳位從厚故人皆謂從珂為養子按張昭仕明宗為史官異代修廢帝錄無所諱避而不言養子事似可信然李克用先啟元年以前未嘗徇地山東又從珂若果是明宗子明宗必不捨之而立從榮從珂亦當不服

今從薛史

七月蜀太子元膺殺唐道襲

九國志建將七夕出游先一日元膺召諸軍使及諸

王宴飲邸第中且議七夕從行之禮而集王宗翰等不至又曰詰朝元膺入白建曰潘峭毛文錫離間兄弟將圖不軌又曰及聞唐襲徵兵乃遣伶官安悉香諭軍使全殊率天武甲士以自衛又曰明日徐瑤常謙與懷勝軍使嚴璘等協謀以所部兵挾元膺以逐唐襲元膺介馬率卒過其兄宗賀之門召與同進宗賀曰兵起無名

不敢奉命又曰建急召宗侃宗賀及諸軍使令以兵討寇乃逐唐襲至城西斬之盡殺屯營兵又自大安門登陴以入攻瑤謙等歐陽史曰元膺與伶人安悉香軍將喻全殊率天武兵自衛召大將徐瑤常謙率兵出拒襲與襲戰神武門襲中流矢墜馬死十國紀年丁未元膺令軍使喻全殊帥天武兵自衛戍申徐瑤常謙及左大昌軍使王承燧等各帥所部兵奉元膺攻唐道襲道襲自私第被甲乘馬過王宗賀門邀之宗賀曰兵起無名且不奉詔公宜緩行元膺遣天武將唐據帥親兵逐道襲至城西斬之据九國志云徐瑤等挾元膺以逐唐襲似襲在官中欲逐出之也歐陽史云元膺召瑤等率兵出拒襲攻東宮而元膺拒之紀年云瑤等奉元膺攻道襲襲自私第被甲乘馬似道襲出在外第元膺就攻之也按道襲止以挾君自重既勸蜀主發兵自衛宜肯更出在外第必止於禁中也蓋瑤等引兵攻宮禁以求道襲道襲以屯營兵出拒戰兵敗走至城西為唐據所殺

耳九國志又云元膺介馬率卒過其兄宗賀之門召與同進是元膺邀宗賀也紀年云道襲自私第被甲乘馬過宗賀門邀之是道襲邀宗賀也按道襲私第安得有兵觀宗賀所荅之辭似語太子非語道襲也若遇道襲宜勸之速入宿衛豈得云公宜緩行也潘炕言太子非有它志陛下宜面諭大臣以安社稷蓋當時蜀主閭亂既信道襲之言又不忍討太子無決然號令故炕言太子無它志當召大臣討徐瑤等為亂者耳九國志云令宗侃等出討寇乃逐唐襲至城西斬之是官軍斬襲也若然何故明日遽加襲贈諡乎此必誤也

資治通鑑考異卷二十八

欽定四庫全書

資治通鑑考異卷二十九

宋 司馬光 撰

後梁紀下

貞明元年二月王殷自焚

莊宗列傳宋友貞傳云乾化四年十一月拔徐州殷自燔

死五代通錄薛史紀及王殷傳皆云貞明元年春今從之

三月趙巖等請分魏博六州為兩鎮

莊宗列傳宰相敬翔祖庸使趙巖判

官邵贊等為友貞畫策分魏博六州為兩鎮薛史無敬翔名今從之

己丑魏軍亂

莊宗列傳二十七曰劉鄩屯南樂遣龍驤都將王彥章以五百騎入魏州是夜三鼓

魏軍亂是月辛酉朔薛史紀云己丑魏博軍作亂蓋莊宗列傳九字誤為七字耳

四月李保衡殺李彥魯

蜀書劉知俊傳保衡作彥康今從薛史

五月牛存節屯楊劉

牛存節傳楊劉作陽留或陽劉今從唐裴度傳及薛史諸人傳

六月晉王以李存進為天雄都巡按使

莊宗實錄云為軍城使存進傳

云都部署莊宗列傳及薛史存進傳皆云天雄軍都巡按使今從之

七月晉王以李巖為澶州刺史

莊宗實錄作李巖今從薛史

周德威擒斥候者斷腕縱之使言已據臨清

薛史德威間劉剝東

還急趨南宮知鄴軍在宗城遣十餘騎迫其營擒斥候者數十人皆傳刃於背繫而遣之既至謂鄴曰周侍中已據宗城矣鄴軍大駭按傳刃於背其人豈能復活而言今從莊宗實錄及薛史莊宗紀又鄴見在宗城而云周侍中據宗城蓋臨清字誤耳

高行周言代州養壯士亦為大王

周太祖實錄晉王密令人啗之利祿行周

辭曰揔管用人亦為國家事揔管猶事王也予家昆仲脫難再生承揔管之厚恩安忍背之按明宗實錄此年猶為代州刺史天祐十八年始為副總管此言總管蓋周太祖實錄之誤

十一月乙丑改元

吳越備史云正月壬辰朔改元大赦今從薛史末帝紀

庚辰劉知俊奔蜀軍

十國紀年知俊奔秦州庚戌來降按上有甲戌下有癸未必庚辰也

二年八月張筠弃相州走晉以李嗣源為刺史

劉恕廣本云筠

奔東都授左衛上將軍莊宗實錄命李存審入城招撫除昭德軍額仍舊隸魏州徙洺州刺史袁建豐為相州刺史按上四月筠已遣人納款於晉此復云走者蓋始者文降今為晉兵所迫故走耳筠既降晉今還猶得將軍者蓋潛通款於晉梁朝不知耳明宗實錄云八月張筠走移帝為相州刺史九月為安國軍節度而莊宗實錄云袁建豐為相州刺史按明宗實錄建豐傳云戰胡柳陂時建豐猶為相州乃是天祐十五年十二月蓋明宗初為相州移邢州後方除建豐莊宗錄誤書在張筠走下耳

李存審為安國節度使

王溥五代會要薛史地理志樂史寰宇記皆云梁建保義軍唐

同光元年改為安國軍而莊宗明宗實錄列傳薛史存審傳皆云此年授安國節度使恐是才屬晉即改軍額

會要等書誤
云同光元年

契丹陷晉蔚州虜振武節度使李嗣本

開元中振武軍在朔州西北三

百五十里單于都護府城內隸朔方節度使乾元年置振武節度使領鎮北大都護麟勝二州後唐振武節度亦帶安北都護麟勝等州觀察等使石晉以後皆帶朔州刺史據此乃治尉州不知遷徙年月

九月貝人殺張源德嬰城固守

莊宗寶錄賊將張源德固守貝州既聞河北皆

平而有翻然之志詢謀於衆羣賊皆河南人懼其歸罪不從因殺源德噉人為糧固守其城王歸歷年攻圍賊既食竭呼我大將曰今欲請罪懼晉王不我赦我將甲持兵而見已即解之如何報曰無便於此者賊衆三千餘甲出降我將甘言喻之俱釋兵解甲既而四面陳兵皆殺之歐陽史死事傳曰晉王入魏河北六鎮數十

州之地皆歸晉獨貝一州圍之踰年不可下城中食且盡貝人勸源德出降源德不從遂見殺按源德若以不降而死其衆當即降於晉豈得猶拒守與晉邀約而後出哉明是衆懼死不降耳今從莊宗實錄

十月鄭珏同平章事

薛史梁末帝紀無珏初拜相年月此年十月丁酉以中書侍郎平章

事鄭珏兼刑部尚書平章事至貞明四年四月己酉又云以中書侍郎平章事鄭珏兼刑部尚書疑貞明二年拜相四年轉刑部尚書也本傳云累遷禮部侍郎貞明中拜平章事唐餘錄均帝紀貞明二年十月丁酉禮部侍郎鄭珏為中書侍郎平章事今從之又高若拙後史補云珏應一十九舉方捷姓名為第十九人第行亦同自登第凡十九年為宰相今按珏光化三年及第自光化三年至此年纔十七年矣又不可合

十二月慶州叛賀瓌討之

薛史賀瓌傳貞明二年慶州叛為李繼陟所據帝命左龍

虎統軍賀瓌為西面行營馬步軍都指揮使兼諸軍都虞候與張筠破湮鴈之衆三萬下寧衍二州此非小事而末帝紀李茂貞傳皆無惟瓌傳有之今以為據

契丹阿保機稱帝改元神冊

紀年通譜云舊史不記保機建元事今契丹中有歷

日通紀百二十年臣景祐三年冬北使幽薊得其歷因閱年次以乙亥為首次年始著神策之元其後復有天贊按五代契丹傳自耶律德光乃記天顯之名疑當時未得其傳不然虜人取保機無號追為之耳保機虜中又號天皇王虜廷雜記曰太祖一舉併吞奚國仍立奚人依舊為奚王命契丹監督兵甲又滅勃海虜其王大諲譌立長子為勃海東丹王號人皇王自號天皇王始立年號曰天贊又曰神冊國號大遼於所居大部落置樓謂之西樓今謂之上京又於其南木葉山置樓謂之南樓又於其東千里置樓謂之東樓又於其北三百里

置樓謂之北樓太祖四季常遊獵於四樓之間又曰阿保機變家為國之後始以王族號為橫帳姓丹里沒里以漢語譯之謂之耶律氏賜后族姓曰蕭氏王族惟與后族通昏其諸部若不奉北主之命不得與二部落通昏歐陽史曰阿保機用其妻述律策使人告諸部大人曰我有鹽池諸部所食然諸部知食鹽之利而不知鹽有主人可乎當來犒我諸部以為然共以酒會鹽池阿保機伏兵其旁酒酣伏發盡殺諸部大人遂立不復代阿保機稱皇帝前史不見年月莊宗列傳契丹傳在莊宗即位李存審守范陽後漢高祖實錄唐餘錄皆云阿保機設策併諸族遂稱帝在乾寧中劉仁恭鎮幽州前薛史在莊宗天祐末按紀年通譜阿保機神策元年歲在丙子乃莊宗天祐十三年梁貞明二年似不在天祐末及莊宗即位後編遺錄開平二年五月太祖賜阿保機記事猶呼之為卿及言臣事我朝望國家降使冊立必未稱帝安得在劉仁恭鎮幽州前唐餘錄全取漢

高祖實錄契丹事作傳最為差錯不知其
稱帝實在何年今因其改年號置於此

韓延徽入契丹

漢高祖實錄延徽傳云天祐中連帥劉
守光攻中山不利欲結北戎遣延徽將

命入虜劉恕以為劉守光據幽州後未嘗攻定州惟唐
光化三年汴將張存敬拔羸莫攻定州劉仁恭遣守光
救定州為存敬所敗恐是此時仁恭方為幽帥非守光
也按劉仁恭父子彊盛之時常陵暴契丹宜肯遣使與
之相結乾化元年守光攻易定王處直求救於晉故晉
王遣周德威伐之其遣延徽結契丹蓋在此時然事無
顯據故但云
衰困附於此

四年六月蜀主殂

北亭瑣言云余聞公弼親吏曹處琪
言建疑信王暴卒唐文惠與徐妃張

裕陰謀使尚食進鷄燒餅因寘毒建疾因大臣魏弘夫
等請誅文惠建曰太子好酒色若不克負荷幸無殺之

徐氏兄弟勿與兵權言訖長吁而逝劉恕按舊史貶文
康後二十七日蜀主始殂疑曹處琪之妄孫光憲從而
之記

吳朱瑾殺徐知誥即日引兵濟江吳錄九國志徐

死知誥過江皆無日江南錄曰先主聞亂即日以州兵
度江至廣陵會瑾自殺因撫定其衆十國紀年吳史六

月乙卯瑾殺知誥踰城自殺戊午知誥入揚州代知誥
執政已未誅瑾黨與廣本戊午知誥親吏馬仁裕聞知

訓死自蒜山渡白知誥知誥即日帥兵入揚州撫定吏
民按楊潤相去至近知誥宜得四日然後聞之今從江

南錄

七月戊戌吳以徐知誥為淮南節度行軍副使內外馬

步都軍副使通判府事

按十國紀年六月乙卯知訓被殺至此四十四日吳之政事必

有所出蓋知誥至廣陵即代知訓執吳政至此方除官耳

八月張萬進叛

莊宗實錄天祐十五年八月己酉張萬進歸款薛史末帝紀貞明五年三月癸

未削奪張守進官爵命劉鄩為制置使十月下兗州族守進萬進傳云貞明四年七月叛五年冬拔其城劉鄩傳云五年萬進反冬拔其城莊宗實錄萬進傳云劉鄩攻圍歷年屠其城莊宗列傳云天祐十五年八月萬進歸於我均王無實錄紀傳多不同難以為據今以莊宗實錄列傳為定

五年七月高麗僧躬又稱王

薛史唐餘錄歐陽史皆云唐末其國自立王前王姓

高氏後王建此據十國紀年

十二月晉王秉勝拔濮陽

莊宗實錄天祐十五年賀瓌屯於濮州北行臺里十二月

辛酉上次於臨濮賊亦捨營踵我癸亥次於胡柳明旦接戰王彥章敗走濮陽甲子進攻濮陽一鼓而拔按唐地理志濮州亦謂之濮陽郡治郵城有濮陽臨濮二縣據莊宗實錄則行臺里在臨濮東胡柳在濮陽東彥章所保莊宗所拔者皆濮陽縣非濮州也而莊宗列傳及薛史閻寶傳皆云彥章騎軍已入濮州山下惟列步兵及向晚皆有歸心是以濮陽即為濮州也李嗣昭傳嗣昭云賊無營壘去臨濮地遠日已晡晚皆有歸心但以精騎撓之無令夕食晡後追擊破之必矣我若收軍拔寨賊入臨濮俟彼整齊復來則勝負未決是又以濮陽即為臨濮也按薛史梁紀貞明五年四月制書放濮州稅課是濮州猶屬梁也莊宗實錄天祐十六年十二月攻下濮陽下教諭曹濮百姓勸令歸附是濮州未屬晉也又賀瓌屯土山西晉軍在其東彥章已西入濮陽瓌

豈得更東歸臨濮疑實傳濮州嗣昭傳臨濮皆當為濮陽史氏文飾之誤也又莊宗實錄去年十二月晉已拔濮陽至此又云攻下濮陽按薛史梁紀去年十二月晉人攻濮陽陷之今年十二月又云晉人陷濮陽唐紀去年冬拔濮陽今年四月追襲賀瓏至濮陽十二月無攻下濮陽事賀瓏事貞明四年領大軍營於行臺村十二月戰敗四月退軍行臺尋卒若非實錄及梁紀重複則是去冬唐雖得濮陽弃而不守今年冬復攻拔之也

六年四月李琪罷為太子少保

薛史止有琪作相月日無罷相年月故終言之

朱友謙取同州晉王以朱令德為節度使

莊宗列傳上令幕客王正

言送節旄賜之莊宗實錄列傳薛史友謙傳皆云友謙以令德為帥請節鉞不許薛史末帝紀貞明六年云陷同州以令德為留後表求節旄不允而貞明四年六月甲辰以歙州刺史朱令德為忠武留後恐是四年已陷

同州

五月徐溫言使楊氏無男有女亦當立

吳錄九國志有女當立之語在

誅張顥時今從薛史十國紀年王疾病大丞相溫來朝議立嗣君門下侍郎嚴可求言王諸子皆不才引蜀先主顧命諸葛亮事溫以告知誥知誥曰可求多知言未必誠不過順大人意爾溫曰吾若自取非止今日張顥之亂嗣王幼弱政在吾手取之易於反掌然思太祖大漸欲傳位劉威吾獨力爭太祖垂泣以後事托我安可忘也乃與內樞密使王令謀定策稱隆演命迎丹陽公溥監國己丑隆演卒六月戊申溥即王位恐可求亦不應有此言

今從薛史

龍德元年正月張承業諫晉王稱帝遂得疾不復起

莊宗

實錄上初獲玉璽諸將勸上復唐正朔承業自太原急
趣謁上曰殿下父子血戰三十餘年蓋緣報國復仇為
唐宗社今元凶未殄軍賦不充河朔數州弊於供億遽
先大號費養兵之事力困凋弊之生靈臣以此為一未
可也殿下既化家為國新創廟朝典禮制度須取太常
準的方今禮院未見其人儻失舊章為人輕笑二未可
也因泣下沾衿上曰余非所願柰諸將意何承業自是
多病日加危篤卒官莊宗列傳上受諸道勸進將篡帝
位承業以為晉王三代有功於國先王怒賊臣篡逆匡
復舊邦賊既未平不宜輕受推戴方疾作肩輿之鄴宮
見上力諫大指皆如實錄薛史唐餘錄皆與莊宗列傳
同五代史闕文承業謂莊宗曰吾王世奉唐家最為忠
孝自貞觀以來王室有難未嘗不從所以老奴三十餘
年為吾王收拾財賦召補軍馬者誓滅逆賊朱溫復本
朝宗社耳今河朔甫定朱氏尚存吾王遽即大位可乎
莊宗曰柰諸將意何承業知不可諫止乃慟哭曰諸侯

血戰本為李家今吾王自取之悞老奴矣即歸太原不
食而死秦再思洛中紀異承業諫帝曰大王何不待誅
克梁孽更平吳蜀俾天下一家且先求唐氏子孫立之
復更以天下讓有功者何人輒敢當之讓一月即一月
牢讓一年即一年牢設使高祖再生太宗復出又胡為
哉今大王一旦自立頓失從前仗義征伐之旨人情急
矣老夫是閹官不愛大王官職富貴直以受先王付囑
之重欲為先王立萬年之基爾莊宗不能從乃謝病歸
太原而卒歐陽史兼采闕文紀異之意按實錄等書承
業止惜費多及儀物不備太似淺陋如闕文所言承業
事莊宗父子數十年唐室近親已盡豈不知其欲自取
之意乎褒美承業亦恐太過又按傳真以天祐十八年
正月獻寶承業以十九年十一月卒云即歸太原不食
而死亦非實也如紀異之語承業為莊宗忠謀近得其
實今取之

五月劉鄩飲酖而卒

莊宗實錄云憂恚發病卒薛史云張宗奭承朝廷密旨逼令飲酖而

卒今從之

二年四月晉王以李繼韜為安義留後

按潞州本號昭義軍今以繼韜

為安義留後蓋晉王避其父諱改之耳及繼韜降梁梁亦以為匡義節度使今人猶謂澤州為安義云

後唐紀上

莊宗同光元年二月以盧程為相

薛史唐紀作盧澄今從實錄莊宗列傳

吳越王鏐始建國置百官

十國紀年鏐功臣諸子領節制皆署而後請命居室服御

窮極侈靡末年荒恣尤甚錢氏據兩浙逾八十年外厚貢獻內事奢僭地狹民衆賦歛苛暴鵝魚卵菜纖悉收

取斗升之逋罪至鞭背每笞一人則諸按吏各持其簿列于庭先唱一簿以所負多少為笞已次吏復唱而笞之盡諸簿乃止少者猶笞數十多者至五百餘訖于國除人苦其政吳越備史稱鏐節儉衣食用紬布常膳惟覓漆器為寢帳壞恭穆夫人欲易以青繪鏐不許嘗歲除夜會子孫鼓琴未數曲止之曰聞者以我為長夜之飲遂罷錢易家話稱鏐公燕不二羹戴衣必三澣然後易劉恕以為錢元瓘子信撰吳越備史備史遺事忠懿王勲業志戊申英政錄弘侖子易撰家話侏子惟演撰錢氏慶系圖譜家王故事秦國王貢奉錄故吳越五王行事失實尤多虛美隱惡甚於他國按錢鏐起於貧賤知民疾苦必不至窮極侈靡其奢汰暴斂之事蓋其子孫所為也

今從家話

七月梁主徵王彥章還大梁

歐陽史云末帝罷彥章以段凝為招討使彥章馳至

京師入見以笏畫地自陳勝敗之迹巖等
諷有司劾彥章不恭勒還第今從實錄

八月梁敬翔李振請罷段凝歐陽史以為太祖時事按

河為境故常以大軍守之太祖時未也就使當時曾叱
軍河上亦未繫社稷之安危也况太祖時振言聽計從

均王時始疎斥比必均王時事也既不知
其的在何時故因疑任招討使而見之

蜀內皇城使潘在迎在迎先為內皇城使貶雅州蜀主

稱其
舊官

九月李從珂敗王彥章前鋒於遞坊鎮薛史作遞公

十月梁主殺邵王友誨等薛史云友諒友能友誨莊宗

均王親弟猶疑而殺之況其從弟
嘗為亂者豈得獨存故附於此

皇甫麟

莊宗實錄麟作麟今
從莊宗列傳及薛史

帝命訪求梁主或以其首獻

實錄帝慘然曰敵惠敵怨
不在後嗣朕與梁主十年

戰爭恨不生識其面按莊宗漆均王首藏
之太社豈有欲全之之理此特虛言耳

漆朱友貞首藏太社

薛史末帝紀云詔河南尹
張全義收葬之今從實錄

十一月張全義請帝遷都洛陽

實錄甲辰議脩洛陽太
廟按梁以汴州為東京

洛京為西京莊宗以魏州為東京太原為西京真定為
北都及滅梁廢東京復為汴州以永平軍為西京而不
云以洛陽為何京若以為東京則與魏州無以異諸書
但謂之洛京亦未嘗有詔改梁西京為洛京也至同光

三年始詔依舊以洛京為東都或者以永平為西京時
即改梁西京為洛京而史脫其文也今無可質正故但
謂之洛陽

十二月高季興過襄州斬關而去

五代史補季興行已決旬莊宗且悔遽以

急詔命襄州節度劉訓伺便圖之無何季興至襄州就館而心動謂親吏曰梁先輩之言中矣與其住而生不若去而死遂棄輜重與部曲數百人南走至鳳林關已昏黑於是斬關而出是夜三更向之急詔果至劉訓度其去遠不可逐而止王舉天下大定錄亦云莊宗遣使追之不及按季興自疑故斬關夜遁耳未必莊宗追之也今從

薛史

二年正月岐王上表稱臣

茂貞改封秦王薛史無的確年月實錄同光元年十一月

壬寅已稱秦王茂貞遣使賀收復自後皆稱秦王至二年二月辛巳制秦王李茂貞可封秦王宜有秦王封秦王之理必是至時始自收王封秦王也

五月戊申蜀主遣李嚴還

實錄七月戊午蜀遣歐陽彬朝貢十月癸巳遣客省使李

嚴充蜀川四信使三年八月戊辰嚴自西川迴蜀書四月己巳朔唐使李嚴來聘五月戊申遣嚴歸本國十一月己未朔遣彬為唐國通好使按錦里者舊傳是歲遣歐陽彬通聘洛京莊宗遣李嚴來修好笏記云宜謂大蜀皇帝特遣蘇張之士來追唐蜀之歡吾皇迴感於蜀皇復禮遠酬於厚禮然則嚴為回信使也或者歐陽彬之前蜀已有入洛之使乎若如實錄年月則李嚴以二年十月奉使至三年八月方歸何留之久乎十國紀年蜀史又云九月己亥唐帝遣李彥稠來使十一月辛丑遣彥稠東還又八月以後遣王宗鐸等戍洋利以備東

師此似用宋光祿之言十一月以後以唐國通好
召諸軍還似因彥稠來而罷之今並從蜀書年月

十一月蜀主遣歐陽彬來聘

實錄七月戊午蜀主遣戶部侍郎歐陽彬來使致書

用敵國禮蜀書後主紀十一月乙未命翰林學士兵部侍郎歐陽彬為唐國通好使今從之

三年十月丁丑蜀威武城降

實錄十月戊寅魏王繼父至鳳州王承捷以鳳興父

成四州降前一日康延孝李嚴至故鎮威武城唐景思等降按今故鎮在鳳州西四程延孝未下鳳州何能先至故鎮又蜀之守禦必在鳳州之東或者當時鳳州之東別有威武城亦名故鎮非今之故鎮歟

辛巳興州刺史王承鑒弃城走

實錄甲申魏王至故鎮康延孝收興州十國紀

年辛巳承鑒出奔甲申繼父郭崇韜至威武城今從之

十一月自出師至克蜀凡七十日

實錄自興師出洛至定蜀城計七十五日

薛史因之按唐軍九月戊申離洛城十一月丁巳入成都止七十日耳實錄薛史之誤也

十二月郭崇韜表董璋為東川節度使

莊宗實錄十二月丙寅以靜難

節度使董璋為東川節度副大使又康延孝傳云郭崇韜除董璋為東川節度使延孝與華州節度使毛璋見

崇韜請以工部任尚書為東川帥崇韜怒曰紹琛反耶敢違吾節度不及二旬崇韜為繼岌所害按大軍以十

一月二十八日丁巳入西川至十二月八日丙寅除董璋東川凡十日明年正月八日殺崇韜至此凡六十日

而云不及二旬崇韜遇害日月殊不相合蓋十二月丙寅崇韜始表璋鎮東川之日耳非降制日也云不及二

旬亦恐誤

王宗弼求西川崇韜陽許之

實錄薛史皆云崇韜以蜀帥許之按崇韜有識略豈可與

大兵取西川反以與宗弼乎此庸人所不為也蓋於時宗弼尚據成都崇韜恐其悔而違拒故陽許之以安其意耳

明宗天成元年二月己亥魏王繼岌至利州遣任圜等

討李紹琛

莊宗實錄己亥繼岌奏康延孝叛遣任圜追討按延孝丁酉叛於劍州豈得己亥奏報已

至洛舊本己亥魏王至利州桔柏津使夜來告繼岌言李紹琛令斷浮梁繼岌署任圜為副招討使令率七千

人騎與都指揮使梁漢顯監軍李廷安討之今從之

三月甲子夜張破敗作亂

莊宗實錄壬戌今上至鄴都癸亥夜張破敗作亂明日入

鄴都明宗實錄三月六日帝至鄴都八日夜破敗作亂薛史莊宗紀壬子嗣源至鄴都甲寅夜破敗作亂明宗

紀與實錄同按長歷此月丁巳朔無
壬子甲寅今從實錄及明宗本紀

四月李嗣源至罍子谷聞莊宗殂

莊宗實錄云今上至鄭州聞變今從明宗實錄

李存沼者莊宗之近屬

唐愍帝實錄符彥超傳云皇弟存沼薛史歐陽史彥超傳作存

霸莊宗列傳薛史張憲傳但云李存沼按莊宗弟無名存沼者存霸自河中衣僧服而往非今日傳莊宗之命者也或者武皇之姪莊宗之弟別無所據不敢決定故但云近屬

百官請嗣源監國

監國本太子之事非官非爵然五代唐明宗潞王周太祖皆嘗監國漢太

后令曰中外事取監國處分又誥曰監國可即皇帝位是時直以監國為稱號也今從之

李從襲勸魏王繼岌亟東行

莊宗實錄征蜀初為都監後勸繼岌殺郭崇韜者李

從襲也明宗實錄云宦官都監李繼襲勸繼岌東還及令自殺又云任園監軍李延襲欲存康延孝及至華州為李冲所殺者復云李從襲蓋從襲誤為繼襲廷襲今從莊宗實錄

六月高季興求夔忠萬三州

莊宗實錄王建於夔州置鎮江軍節度以夔忠萬施

為屬郡雲安監有推鹽之利建升為安州王舉章平蜀詔季興自收元管屬郡荆南史天成元年二月王表請夔忠萬繼岌十國紀年荆南史天成元年二月王表請夔忠萬三州及雲安監隸本道莊宗許之詔命未下莊宗遇弒六月王表求三州明宗許之劉恕按莊宗實錄及薛史帝紀同光三年十一月庚戌荆南高季興奏收復夔忠萬等州曾顏勃海行年記云得夔忠萬等州明宗實錄及薛史韋說傳云討西蜀季興請攻峽內先朝許之如能得三州俾為屬郡三州既定季興無尺寸之功莊宗實錄同光四年三月丙寅高季興請峽內夔忠萬等州割

歸當道明宗實錄天成元年六月甲寅高季興奏去冬先朝詔命攻取峽內屬郡尋有施州官吏知臣上峽率先歸投忠萬夔三州旦夕期於收復被郭崇韜專將文字約臣回歸方欲陳論便值更變此說頗近實故從之蓋三年十月夔忠萬三州降於繼岌十一月庚戌季興奏請三州為屬郡舊史誤云奏收復也行年記差繆最多不可為據或者夔州雖自降於繼岌季興表云收復三州據為己功亦無足怪今從明宗實錄

七月姚坤告哀於契丹

漢高祖實錄作苗紳今從莊宗列傳

丙子葬莊宗

實錄乙亥梓宮發引是月遷幸雍陵按莊宗實錄哀冊文云丙子今從之

九月契丹阿思沒骨餒來

漢高祖實錄作沒姑餒今從明宗實錄及會要

是月吳越王鏐改元寶正

閏自若唐末汎閭錄云同光四年京師亂朝命斷絕鏐遂

僭大號改元保正明年明宗錫命至迺去號復用唐正
朔紀年通譜云鏐雖外勤貢奉而陰為僭竊私改年號
於其國其後子孫奉中朝正朔漸諱改元事及錢俶納
土凡其境內有石刻偽號者悉使人交午鑿滅之惟今
杭州西湖落星山塔院中有鏐封此山為壽星寶石山
偽詔刻之於石雖經鏐毀其文尚可讀後題云寶正六
年歲在辛卯明宗長興二年也其元年即天成二年也
好事者或傳曰保正非也余公綽聞王事跡云同光元
年春梁策錢鏐為尚父來年改寶正元年永隆三年吳
越世宗丈穆王薨林仁志王氏啓運圖云同光元年梁
封浙東尚父為吳越國王尋自改元寶正長興三年吳
越武肅王崩子世皇嗣永隆二年吳越世皇崩子成宗
嗣公綽仁志所記年歲差繆然可見錢氏改元及廟號
故兼載焉至今兩浙民間猶謂錢鏐為錢太祖今參取
諸書
為據

二年二月討高季興東川董璋克東南面招討使夔州

刺史西方鄴副之

按梓夔皆在荆南之西南而云東南面者蓋據夔梓所向言之耳

十月孫晟勸朱守殷反

江南錄作孫忌今從王溥周世宗實錄

三年十二月高季興卒

唐明宗實錄天成三年十一月壬午房知溫奏高季興卒烈祖

實錄亦云乾貞二年十一月季興卒蓋傳聞之誤按陶穀季興神道碑及勃海行年記皆云十二月十五日卒

今從之

四年九月供奉官烏昭遇使吳越

吳越僞史十國紀年皆云監門衛上將軍

蓋借官耳今從實錄等諸書

十二月吳徐知誥酖弟知詢鄭文寶南唐近事烈祖曲宴便殿引酖觥賜周本本

疑而不飲佯醉別引一卮均酒之半跪捧而進曰陛下千萬歲陛下若不飲此非君臣同心同德之義也臣不敢奉詔上色變無言久之左右皆相顧流汗莫知所從伶倫申漸高有機智者竊諭其旨乃乘談諧盡併兩盞以飲之內杯於懷中亟趨而出上密使親信持藥詣私第解之已不及矣漸高腦潰而卒江表志烈祖曲宴引金鐘賜知詢酒曰願我弟百千長壽知詢疑懼引佗器均之曰願與兄各享五百歲知誥不飲久之樂工申漸高乘詎諧併而飲之至家腦潰而卒二書皆出文寶而不同乃爾按知誥既即位欲除周本自應多方不須如此云酖知詢近是今從之

長興元年十一月甲戌王弘贇等破劔州實錄辛巳軍前奏今月十

三日王弘贄馮暉自利州入山路出劔門關外倒下殺董璋把關兵士約三千人獲都指揮使濟彥溫大軍進攻入劔門次又丙戌軍前奏今月十七日收下劔州破賊千餘人獲指揮使劉大李昊蜀高祖實錄己卯東川告急今月十八日北軍自白衛嶺人頭山後過從小劔路至漢源驛出頭倒入劔門打破關寨掩捉彥溫及將士五百餘人遂相次搆喚大軍據關下營又龐福誠謝鎰相謂曰北軍昨來既得關寨之後隔一日大軍會下至劔州而迺般運糧食燒舍自驚還奔關寨十國紀年後蜀史壬申弘贄暉襲陷劔門癸酉攻焚劔州取糧還屯劔門己卯東川告急使至成都知祥命衙內都指揮使李肇帥兵五千赴援董璋自閬州帥兩川兵屯木馬寨先是龐福誠謝鎰屯閬州北來蘇寨閬劔門陷懼北軍據劔州帥部兵千餘人由間道先董璋至劔州壁于衙城後士卒方食北軍萬餘人自北山馳下福誠等趨河橋迎擊之北軍小却福誠帥數百人夜升北山顛轉

至北軍驚擾外大呼譟鎧命將士以弓弩短兵前急擊之
北軍驚擾棄戈甲而遁鎧追襲之北軍退保劍門十餘
日不窺劍州按劍門至成都尚十許程若十八日劍門
失守何得二十日知祥已聞之邪今從實錄十三日壬
申為定若隔一日下至劍州則十五日甲戌非十七日
也故思同等以大軍未至故收糧燒舍還保劍門故福
誠等得復入劍州李昊叙事甚詳無執劉太事今刪
之晉高祖實錄云甲申平劍州破賊千餘人尤誤也

契丹東丹王突欲來奔

實錄阿保機妻今元帥太子往
渤海代慕華歸西樓欲立為契

丹王而元帥太子既典兵柄不欲之渤海遂自立為契
丹王謀害慕華其母不能止慕華懼遂航海內附按天
皇王入汴猶求害東丹者誅之
豈有在國欲殺之理今不取

二年閏五月殺安重誨

五代史闕文李從璋奮槌擊重
誨於地重誨曰重誨死無恨但

不與官家誅得潞王佖日必為朝廷之患言終而絕按
重誨自以私憾欲殺從珂當是時從珂未有跋扈之跡
重誨何以知其為朝廷之患此恐是清泰
篡位之後人譽重誨者造此語未可信也

資治通鑑考異卷二十九

欽定四庫全書

資治通鑑考異卷三十

宋 司馬光 撰

後唐紀下

潞王清泰元年三月朱弘昭赴井死安從進殺馮贇

張昭

閔帝實錄帝召弘昭不至俄聞自殺乃令從進殺贇按從進傳贇首於陝則贇死非閔帝之命明矣今不取

四月庚午劉知遠盡殺閔帝左右及從騎

閔帝實錄庚午朔四鼓帝

至衛州東七八里遇敬瑭實貞固晉高祖實錄始帝欲與少主俱西斷孟津北據壺關南向徵諸侯兵乃啓問

康義誠西討作何制置云云蘇逢吉漢高祖實錄是夜
偵知少帝伏甲欲與從臣謀害晉高祖詐屏人對語方
坐庭廡帝密遣御士石敢袖鎚立於後俄頃伏甲者起
敢有勇力擁晉祖入一室以巨木塞門敢力當其鋒死
之帝解佩刀遇夜晦以在地葦炬未燃者奮擊之衆謂
短兵也遂散走帝乃匿身長垣下間帝親將李洪信謂人
曰石太尉死矣帝隔垣呼洪信曰太尉無恙乃踰垣出
就洪信兵共護晉祖殺建謀者以少主授王弘贇南唐
列祖實錄弘贇曰今京國貼危百官無主必相率攜神
器西向公何不囚少帝西迎潞王此萬全之計敬塘然
其語按為晉漢實錄者必為
二祖飾非今從閔帝實錄

是日太后令內諸司迎潞王

廢帝實錄三十日太后傳
令至并內司迎奉至乾壕

帝促令還京按長曆三月辛丑朔四月
庚午朔三月無三十日廢帝實錄誤也

癸酉廢少帝為鄂王

閔帝實錄云七日廢帝為鄂王今從廢帝實錄

十二月葬鄂王

閔帝實錄及薛史閔帝紀皆云晉高祖即位謚曰閔與秦王及重吉並葬徽陵

域中今從廢帝實錄

二年三月吳徐知誥令陳覺輔景遷

江南錄時先主權位日隆中外皆知

有代謝之勢而以吳主恭謹守道欲待嗣君先主次子景遷吳主之壻也先主鍾愛特甚齊邱使陳覺為景遷教授為之聲價齊邱參決時政多為不法輒歸過於嗣主而盛稱景遷之美幾有奪嫡之計所以然者以吳主少而先主老必不能待他日得國授於景遷易制已為元老威權無上矣此其日夕為謀也先主覺之乃召齊邱如金陵以為己之副遙兼申蔡節度使無所關預從容而已今從十國紀年

後晉紀

高祖天福元年五月魏博逐劉延皓

廢帝實錄延皓皇后之姪按薛史唐

餘錄歐陽史皆云延皓后之弟應州人也延朗宋州虞城人也獨廢帝實錄云后姪今不取

七月誅石敬瑭之子重殷重喬

薛史七月已丑誅右衛上將軍石重英皇城副

使石重喬皆敬瑭之子也廢帝實錄云石諱妹男尚食使重乂供奉官重英與薛史不同按重乂敬瑭子即位後為張從賓所殺實錄誤也廣本英作殷今從之

九月契丹五萬騎自揚武谷而南

代州今有陽武寨其北有長城嶺聖佛谷

今從漢高祖實錄作揚武

契丹陳於虎北口

按此在太原而云陳於虎北口亦名古北

歸虎北口蓋太原城側別有地名虎北口也

十月詔每七戶出征夫一人

薛史云十戶今從廢帝實錄

十一月丁酉石敬瑭即皇帝位

廢帝實錄閏月丁卯胡立石諱為天子於柳林

誤也今從晉高祖實錄薛史契丹冊文

閏月契丹主令太相溫送帝至河梁

廢帝實錄作高謨翰范質陷蕃記作

高模翰歐陽史作高年翰蓋蕃名太相溫漢名高謨翰今從晉高祖實錄

二年正月乙卯日有食之

實錄正月甲寅朔乙卯日食十國紀年蜀乙卯朔日食蓋

晉人避三朝
日食改歷耳

二月吳越王繆少子元球

晉高祖實錄十國紀年作元球今從吳越備史九國志

十月唐李德誠出宋齊丘書

十國紀年云遣宗信書令宗信諷止德誠勸進而不

云宗信何人今但云止德誠勸進書

十一月加錢元瓘天下兵馬副元帥進封吳越國王

實錄

天福二年十一月加元瓘副元帥國王程遜等為加恩使四年十月丙午以程遜沒於海廢朝贈官程遜傳云

天福二年秋使吳越使回溺死元瓘傳云天福三年封吳越國王蓋二年冬制下遜等以三年至杭州不知溺

死在何年而晉朝以四年十月始間之也吳越備史天福二年四月敕遣程遜等授王副元帥國王甲午王即

位用建國之儀如同光故事是歲程遜還京溺於海按元瓏初立稱鏐遣命止用藩鎮禮明年明宗封吳王應順初閏帝封吳越王故以天福二年即王位而備史以為授元帥國王然後即位誤矣

以賈仁沼代胡漢筠

薛史仁沼作仁紹今從實錄

三年八月以馮道劉昫為契丹冊禮使

周世宗實錄馮道傳云虜遣使

加徽號於晉祖晉亦獻徽號於虜始命兵部尚書王權銜其命權辭以老病晉祖謂道曰此行非卿不可道無難色按晉高祖實錄天福三年八月戊寅道為契丹太后冊禮使十月戊寅北朝命使上帝徽號戊子王權以不受北使停任周世宗實錄誤也

十月桑維翰李崧皆罷樞密使

實貢固晉少帝實錄及薛史劉處讓傳云楊光

遠入朝遂於高祖前面言執政之失乃罷維翰等樞密使以處讓為之楊光遠傳云范延光降光遠面奏維翰擅權高祖以光遠方有功於國乃出維翰領安陽光遠為西京留守今按晉高祖實錄天福三年十月壬辰維翰罷樞密使庚子光遠始入朝對於便殿十一月戊申光遠為西京留守天福四年閏七月壬申維翰出為相州節度使蓋處讓光遠傳之誤晉少帝實錄及薛史桑維翰傳叙光遠鎮洛陽後疏維翰出相州是也

十一月吳讓皇卒

薛史唐餘錄皆云溥禪位踰年以幽卒歐陽史但云卒九國志云溥能委

運授終不懼篡殺之禍深於機者也十國紀年曰辛丑唐人弒讓皇事不可明今但云卒

四年二月唐主復姓李氏祖吳王恪

周世宗實錄及薛史稱昇唐主宗第

六子永王璘苗裔江南錄云憲宗第八子建王恪之玄孫李昊蜀後主實錄云唐嗣薛王知柔為嶺南節度使

卒於官其子知誥流落江淮遂為徐溫養子吳越備史云昇本潘氏湖州安吉人父為安吉砦將吳將李神福攻衣錦軍過湖州虜昇歸為僕隸徐溫嘗過神福愛其謹厚求為養子以識云東海鯉魚飛上天昇始事神福後歸溫故冒李氏以應識劉恕以為昇復姓附會祖宗故非李氏而吳越與唐人讐敵亦非實錄昇少孤遭亂莫知其祖系昇曾祖超祖志乃與義祖之曾祖祖同名知其皆附會也

四月唐人遷讓皇之族於秦州

十國紀年唐人遷讓皇之族於秦州號永寧宮

守衛甚嚴不敢與國人通昏姻久而男女自為匹偶江表志讓皇子及五歲遣中使拜官賜朝服即日而卒按唐烈祖受禪使讓皇居故宮稱臣上表慕仁厚之名若惡楊氏則滅之而已何必如此之污也它書皆未之見不知紀年據何書今不取

閏七月閩王延羲弒康宗自稱威武節度使閩國王改

元永隆

十國紀年通文四年延羲自稱威武節度使改元永隆即晉天福四年也周世宗實錄薛史唐

餘錄南唐烈祖實錄吳越備史及運歷圖紀年通譜皆同惟閩中啓運圖通文四年已亥閏七月延羲立明年

庚子改元永隆五年甲辰被弒林仁志閩國人載延羲改年宜不差失然五代士人撰錄國書多不憑舊文出

於記憶及傳聞雖本國近事亦有抵牾者高遠叙事頗有本末余公綽雖在仁志之後然亦閩人故不敢獨從

仁志所記又王曦既立若但稱節度使則不應改元及其臣為三公平章事按晉高祖實錄天福五年十一

月甲申授閩國王延羲威武軍節度使閩國王是曦先已自稱閩國王紀年脫漏耳

五年正月釋閩使鄭元弼等

洛中紀異云昶既為朝命所責乃遣使越海聘於契

丹即將籍沒之物為贄晉祖方卑辭以奉戎主戎主降偽詔曰閩國禮物並付喬榮放其使人還本國晉祖不敢拒之既而祖又遣使於契丹求馬由滄齊淮甸路南去自茲往復不一時人無不憤惋按昶以天福四年閏七月被弑十月元弼等至京下獄昶安得知而告契丹今不取

六年九月辛酉滑州言河決

薛史紀載九月辛酉滑州河決而不載庚午濮州決

高祖實錄載庚午濮州奏河決而不載辛酉滑州決五代會要及志皆云天福六年九月決滑州兗濮州界皆為水漂溺史匡翰傳亦云天福六年白馬河決按辛酉滑州河已決則下流皆涸濮州無庚午再決之理蓋滑州河決漂浸及濮州耳

七年五月帝寢疾以幼子屬馮道

漢高祖實錄晉高祖大漸召近臣屬之曰

此天下明宗之天下寡人竊而處之久矣寡人既謝當歸許王寡人之願也此說難信今從薛史

齊王天福八年三月閩王納尚保殷之女為妃閩錄作尚可殷

今從十國紀年

九月河陽牙將喬榮

漢隱帝實錄作喬煒陷蕃記作喬瑩今從晉少帝漢高祖實錄薛史

景延廣傳契丹傳

開運元年正月唐主敕齊王景遂參決庶政蕭儼上疏

江南錄此敕在去年十二月今從十國紀年紀年云宋齊丘上疏今從江南錄

二年三月李仁達殺王繼昌

閩中實錄閩王列傳九國志皆云四月殺繼昌今從

十國
紀年

仁達立卓巖明為帝

閩錄啓運圖啓國實錄江南錄作嚴明閩中實錄開王列傳九國志

薛史唐餘錄王審知傳吳越傳史作儼明今從之江南錄云明本名偃為僧名體明即位改巖明今從之

繼昌為裨將王延諷所殺旬日故內臣李義殺諷立巖明為主今從十國紀年

晉軍至白團

漢高祖實錄作白檀今從晉少帝實錄

三年四月中山人孫方簡

周世宗實錄云清苑人今從漢高祖實錄

九月契丹使劉延祚詐以瀛州內附

歐陽史作高年翰按陷蕃記前云延

祚詐翰誠款後云大軍至瀛州偵知蕃將高模翰潛師而出蓋延祚為刺史模翰乃戍將耳今從陷蕃記

十一月杜威趣恒州以張彥澤為前鋒

備史曰彥澤狼子其心密已變

乃通款邪律氏請為前導因促騎說威引軍汭濟水西援常山及至真定東垣渡與威通謀先遣步衆跨水不之救致敗將沮人心以行詭計因促監者高勲請降於虜按彥澤與威若已通款於契丹則彥澤何故猶奪橋契丹何故猶議回旋今不取

十二月彥澤殺桑維翰

薛史帝思維翰在相時累貢謀畫請與虜和慮戎主到京則顯

彰已過欲殺維翰以滅口因令張彥澤殺之按是時彥澤豈肯復從少帝之命今不取

後漢紀

高祖天福十二年正月晉主迎契丹主辭不見

漢高祖實錄少

帝帥族侯於野邪律氏疏之帝指陳前事乃大臣同謀皆歷歷能對無撓屈色邪律氏亦假以顏色陷蕃記薛史帝紀五代通錄云戎主不與帝相見少帝實錄帝舉族待罪於野虜長而撫之遣泊封禪寺今從陷蕃記

契丹主以劉晞為西京留守

實錄作禧或云名珙今從陷蕃記

潘聿撫為橫海節度使

周太祖實錄聿撫作聿涅今從陷蕃記

二月延州軍亂逐周密推高允權為留後

周太祖實錄允權為膚施

今陷蕃記云前錄事參軍退居田里漢高祖實錄云允權為延州令周密以允權故將之子恐與邊人締結移為州主簿密後以暗而黨下惟誅掠是務允權乘其民怨時以言間之復遣親黨潛構諸部衆心遂搖廣本云允權為延州令密徙為錄事參軍今從之周太祖實錄又曰契丹犯闕以周密為延帥按晉少帝實錄開運三

年八月辛未以右龍武統軍周密為彰武節度使非契丹所授今從漢高祖實錄

三月以皇弟崇行太原尹

薛史云崇高祖從弟王保衡晉陽見閭錄云仲弟歐陽史

云母弟今從實錄

劉晞奔許州方太入洛陽伊闕賊帥稱天子太擊走之

實錄方太傳云劉禧走許田復有潁陽妖巫姓朱號嗣密王誓衆於洛南郊天壇號萬餘人大率部兵與朝士輩虛張幡幟一舉而逐之洛師遂安今從陷蕃記

丙子契丹主卒

實錄云二十日乙亥卒今從陷蕃記

五月馬希範卒劉彥瑫等立希廣

十國紀年五月己丑希範得疾集國官告

以傳位希廣湖湘故事希廣又不能彊弱猶豫之間羣輔明日衆口勸上乃受軍府排衙賀之以其事奏朝廷託以希範臨終之日遺言以付希廣按希範存時若已集國官傳位希廣則沃後將佐誰敢更有異議必彥瑫等假託希範遺令也今從湖湘故事

乾祐元年三月從孫方簡為大同節度使

實錄方簡作方諫按方簡

避周諱改名方諫實錄誤也

匡國節度使張彥威

周太祖實錄作彥成蓋避周祖諱薛史因之今從廣本

八月壬午以郭威為西面軍前招慰安撫使

薛史周太祖紀七月

十三日授同平章事即遣西征以安慰招撫為名八月六日發離京師按漢隱帝周太祖實錄七月加平章事

制詞無西征之言至八月壬午方受命出征蓋薛史之誤

九月李彥從破蜀兵于散關

實錄戊辰樞密使郭諱上言都監李彥從將兵掩襲

川賊至大散關殺賊三千餘其餘奔甲而遁漢隱帝實錄九月李彥從敗蜀兵於散關而蜀後主實錄無之蜀

實錄十月安思謙敗漢兵於時家竹林遂焚蕩寶雞十

二月又敗漢兵於玉女潭而漢實錄無之蓋兩國各舉

其勝而諱其敗耳然漢實錄言官軍不滿萬人而蜀兵

數倍是二三萬人非小役也豈得全不書殺三千人非

小敗也豈十月遽能再舉蓋九月止是蜀邊將小出兵

為漢所敗漢將因張大而奏之耳又蜀實錄十月但云

思謙退次鳳州不云歸興元十二月云

思謙自興元進次鳳州蓋十月脫略耳

十二月蜀兵食盡引去

十國紀年蜀廣政十二年正月甲寅思謙以軍食匱竭自摸壁

退次鳳州上表待罪蓋去年冬末已退軍明年正月表始到成都耳今從周太祖實錄

隱帝乾祐二年五月吳越內牙都指揮使斜滔吳越備史十國

紀年滔姓皆金旁斗按何氏姓范元和姓纂皆無此姓今括字書斜音他口徒口二切皆云姓也

三年四月郭榮本姓柴世宗實錄曰太祖皇帝之長子也母曰聖穆皇后柴氏以唐天

祐十八年九月二十四日丙午生於邢臺之別墅薛史世宗紀云太祖之養子蓋聖穆皇后之姪也本姓柴氏

父守禮太子少保致仕帝年未童冠因侍聖穆皇后在太祖左右時太祖無子乃養為己子按今舉世皆知世

宗為柴氏子謂之柴世宗而世宗實錄云太祖長子誣亦甚矣

十月楚劉彥瑫攻朗州為馬希萼所敗湖湘故事彥瑫敗在九月十三

日今從十
國紀年

十一月希萼發兵趣長沙
湖湘故事希萼以十月二十一日直往湖南今從十國紀年

己卯侯益等將禁軍趣澶州郭威獲驚脫
丑孟業至澶

州戊寅鄴兵至河上己卯吳虔裕入朝庚辰詔侯益等赴澶州守捉鄴軍獲驚脫又云庚辰郭諱次滑州宋延渥納軍辛巳驚脫還宮薛史隱帝紀丁丑李洪義得密詔遣陳光穗至鄴都翌日郭威以衆南行戊寅至澶州庚辰至滑州是日詔侯益等赴澶州守捉餘與實錄同周太祖實錄十四日陳光穗至翌日遵路明日遇驚脫云見召侯益等令守澶州十六日趨滑臺十七日賞諸軍令奉行前詔十八日自滑而南薛史周太祖紀十六

日至澶州獲驚脫十七日至滑州餘與實錄同按丁丑十四日也若十七日始詔侯益赴澶州則十六日郭威獲驚脫何故已見之也蓋帝遣侯益赴澶州必在十六日驚脫行在遣益之後今從薛史周太祖紀

辛巳宋延渥以滑州降郭威

隱帝實錄十一月丙子誅楊史丁丑孟業至澶州王

殷銅業送郭威即日首塗戊寅至河上見王殷庚辰次滑州周太祖實錄云十三日夜太祖夢入朝見至詰旦

以夢示峻是日陳洪穗至鄴都是十四日丁丑也翌日為衆所迫遵路十五日戊寅也明日行次遇驚脫欲往

澶州十六日已卯也下文又云十六日趣滑臺按大梁至澶州二百七十里澶州至鄴都一百四十里至滑州

三百二十里不應往還如是之速漢周實錄首塗與至滑州日不同蓋十六日趣滑州十七日至滑州也今從

周太祖實錄

欽定四庫全書

資治通鑑考異

十一

帝為亂兵所弑

實錄帝至玄化門劉銖射帝左右帝迴詣西北郭允明露刃隨後西北至趙村

前鋒已及亂兵騰沸上懼下馬入於民室郭允明知事不濟乃抽刃犯蹕而崩薛史隱帝紀郭允明知事不濟於北郊劉恕曰允明帝所親信何由弑逆蓋郭威兵殺帝事成之後諱之因允明自殺歸罪耳按弑帝者未必是允明但莫知為誰故止云亂兵

獲劉銖囚之

五代史闕文周祖自鄴起兵銖盡誅周祖之家子孫婦女十數人極其慘毒及隱帝

遇害周祖以漢太后令收銖下獄使人責銖殺其家對曰銖為漢家戮叛族耳不知其他威怒殺之王禹偁曰周世宗朝史官修漢隱帝實錄銖之忠言諱而不載銖今有子孝和擢進士第按銖所至貪婪酷虐在青州謀不受代賴郭瓊諭之始入朝私怨楊史快其就戮隱帝敗歸射而不納使至野死其屠滅周祖之家出於殘忍

之性耳豈忠義之士邪王禹偁所記蓋憑孝和之言耳今不取

馮道受郭威拜

五代史闕文周祖入京師百官謁之周祖見道猶設拜意道便行推戴道受拜

如平時徐曰侍中此行不易周祖氣沮故禪代之謀稍緩按周祖舉兵既克京城所以不即為帝者蓋以漢之宗室崇在河東信在許州贊在徐州若遽代漢慮三鎮舉兵以興復為辭則中外必有響應者故陽稱輔立宗子信素庸愚不足畏忌贊乃崇子故迎贊而立之使兩鎮息謀俟其離徐已遠去京稍近然後并信除之則三鎮去其二矣然後自立則所與為敵者惟崇而已此其謀也豈馮道受拜之所能沮乎道之所以受拜如平時者正欲示器宇凝重耳

遣馮道等迎武寧節度使贊

周太祖實錄已丑太祖遣前太師馮道往彼諭旨

太祖將奉表於徐州未知所遣樞密直學士王度請行許之宰臣百寮表秘書監趙上交齎詔同日首塗五代史闕文周祖請道詣徐州冊湘陰公為漢嗣道曰侍中由衷乎周祖設誓道曰莫教老夫為謬語人及行謂人曰平生不謬語今為謬語人矣王禹偁曰周世宗朝詔史臣修周祖實錄故道之事迹所宜諱矣按道廉智自將陽愚遠禍恐不肯觸周祖未發之機其徒欲歸美而云耳又隱帝實錄云初議立徐帥太后遣中使馳諭劉崇請崇入繼大位崇知立其子上章謙遜恐無此事今不取

太后臨朝

周太祖實錄云太后自臨朝令稱制隱帝實錄自是至國七止稱詔今從之

殺劉銖等赦其家

實錄國子博士司天監洛陽王處訥素與周祖善因言劉氏祚短事處訥

曰漢歷未盡但以即位後讐殺人夷人之族怨結天下所以杜稷不得久長耳時周祖方以兵圍蘇逢吉劉銖

之弟侯旦而族之聞其言蹶然遽命釋之按周祖時方迎湘陰公立之宜得遽言劉氏祚短乎今不取

十二月武陵何敬真

湖湘故事九國志作何景真今從十國紀年

後周紀

太祖廣順元年二月馬希萼遣劉光輔入貢於唐

湖湘故事

光輔作光漸今從十國紀年

楚小門使謝彥顯

湖湘故事作謝彥欽周羽沖三楚新錄作謝延澤今從十國紀年

五月北漢鄭珙卒於契丹

晉陽見間錄鄭珙既達虜廷虜君恩禮周厚虜俗以酒池

肉林為名雖不飲酒如韋曜輩者亦加灌注縱成疾無復信之珙魁岸善飲罹無量之逼宴罷載歸一夕腐脇

於窮廬之壇堵間興尸而復命九國志契丹宴犒漢使必厚具酒肉以示夸大高祖鎮河東嘗命韋曜北使曜羸瘠不能飲酒虜人強之遂卒按韋曜孫皓時人韋昭也不能飲酒王保衡引以為文章而路振云高祖時人也誤也

九月戊寅徐威等囚馬希萼

十國紀年作丁丑按湖湘故事在十九日今從之

二年十月楊信子崇訓

崇訓或作崇勲世宗實錄作崇訓後蓋避梁王宗訓改名也

顯德元年正月丙申晉王即帝位

太祖實錄乙未宣遺制晉王榮可於樞前

即皇帝位世宗實錄丙申內出太祖遺制羣臣奉帝即皇帝位蓋以乙未宣遺制丙申即位也

二月契丹遣楊衮將萬餘騎如晉陽

晉陽見間錄衮帥騎五七萬號十萬

來會今從
世宗實錄

張元徽為前鋒

世宗實錄賊將張暉領三千騎為前鋒今從晉陽見聞錄

三月癸巳前鋒與北漢兵遇擊之

世宗實錄甲午賊陳於高平南之高原按

下又有甲午此必癸巳誤也今從十國紀年

楊衮全軍而退

五代史補劉崇求援於契丹得飛騎數千及覩世宗兵少悔之召諸將謀曰吾

觀周師易與耳契丹之眾宜勿使但以本軍決戰不唯破敵亦足使契丹見而心服諸將皆以為然乃使人謂契丹主將曰柴氏與吾主客之勢已見必不煩足下餘刃敢請勒兵登高觀之可也契丹不知其謀從之洎世宗之入陳也三軍皆賈勇爭進莫不一當百契丹望而畏之故不敢救而崇敗今從世宗實錄薛史

四月瀛文懿王馮道卒

五代通錄謚曰文懿
今從世宗實錄薛史

五月攻晉陽不克議引還

世宗實錄徵懷孟蒲陝丁夫
數萬攻城旦夕之間期於必

取會大雨軍士勞苦又聞忻口之師不振帝數日憂沮
不食遂決還京之意晉陽見聞錄六月旦周師南轅返

旆惟數百騎間之以步卒千人長鎗赤甲街趨捷
跳梁於城隅晡晚殺行而抽退今從世宗實錄

十一月北漢主殂

劉昫云世宗實錄薛史帝紀僭偽傳
皆云顯德二年十一月劉崇卒大定

錄云顯德二年春昫病死紀年通譜顯德二年崇之乾
祐八年冬崇死顯德三年承鈞改元天會開寶元年承

鈞之天會十三年死開寶二年繼元改元廣運興國四
年繼元之廣運十一年也河東劉氏有國全無記錄惟

其舊臣中書舍人宜翰林院王保衡歸朝後所纂晉陽
偽署見聞要錄云甲寅年春南伐敗歸夏周師攻圍昫

積憂勞成心疾是冬卒鈞即位丁巳年正月旦改乾祐
十年為天會元年又云鈞丙戌年二十九嗣位年四十
三卒右諫議大夫楊夢申奉敕撰大漢都統追封定王
劉繼顯神道碑云天會十二年今皇帝踐祚之初年也
十七年繼顯卒末題廣運元年歲次甲戌九月丙午朔
今按周廣順元年辛亥是即帝位稱乾祐四年顯德元
年甲寅是之乾祐七年也是卒鈞立顯德四年丁巳鈞
改乾祐十年為天會元年宋開寶元年戊辰鈞之天會
十二年也鈞卒繼元立開寶七年甲戌繼元改天會十
八年為廣運元年據厯是歲九月丙午朔興國四年已
卯繼元之廣運六年也鈞以唐天成元年丙戌生至顯
德元年甲寅嗣位乃二十九歲矣鈞及繼元踰年未改
元蓋孟蜀後主漢隱帝周世宗之比也諸書皆傳聞相
因前後差戾惟晉陽見聞錄劉繼顯碑歲月最可考正
故以
為據

世宗顯德二年閏九月蜀趙玘以秦州降

十國紀年玘召宮屬告之

曰周兵無敵今朝廷所遣勇將精兵不死即逃我輩不能去危就安禍且至矣衆皆聽命舉城叛降周斜谷援兵亦潰五代通錄官軍之圍鳳州偽秦州節度使高處儔引兵往復援之中塗聞黃花之敗奔秦州玘與城中將校閉門不納處儔遂西奔玘即以城歸國今從實錄

三年二月潘叔嗣襲朗州王逵戰敗死

湖湘故事云王逵奉詔伐吳有

蜜蜂無萬數集逵傘蓋周行逢內喜潛與潘叔嗣張文表等謀曰我覩王公妖怪入傘他時忽落別人之手我輩處身何地我等若三人同心共保馬氏舊基同取富貴豈不是男兒哉叔嗣文表間行逢之言已會深意遂乃拜受此語各散歸營廣本遠命行營副使毛立為率州營統軍使潘叔嗣張文表為前鋒軍次醴陵縣吏請

具牛酒犒軍立不許叔嗣文表因士卒之怒縛立送于
行逢以兵叛告遠遠大懼乘輕舟奔朗州叔嗣追至朗
州殺之湖湘故事遠連夜走歸朗州亦以舟棹倍程而起至
始到潭州既間王遠走歸朗州亦以舟棹倍程而起至
朗州殺之今按世宗實錄顯德三年二月丙寅朗州王
進遠言領大軍入淮南界庚寅言入鄂州界攻下長山
寨癸巳荆南高保融言進遠自岳州領兵復歸本道又
云潘叔嗣為先鋒行及鄂州叔嗣回戈襲武陵進遠間
之倍道先入武陵叔嗣攻其城進遠敗走為叔嗣所殺
又云三月壬寅進遠差牙將押送淮南將陳澤等蓋進
遠未敗前奏事三月始達行在與薛史承襲傳及湖南
傳記略同惟湖湘故事及丁璫馬氏行事記載遠攻袁
州叔嗣叛事曹衍云遠三月至潭州四月叔嗣叛丁璫
云五月五日叔嗣殺遠於朗州皆妄也周行逢據湖南
仕進尚門蔭衍屢獻文章不得調退居鄉里教授及張
文表叛辟為幕職事敗逃遁會赦乃敢出窮困無以自

進采摭舊聞撰湖湘馬氏故事二十卷如京師獻之太宗憫其窮且老授將作監丞衍本小人言詞鄙俚非有意著書故叙事顛倒前後自相違背以無為有不可勝數素怨周行逢尤多誣毀不欲行逢不預叔嗣之謀乃妄造此說凡載行逢罪惡之甚皆出於衍云璣亦國初人疑其說得於衍書皆不可為據今從十國紀年十二月唐陳處堯如契丹乞兵

十國紀年作兵部郎中
改處常今從晉陽見聞

錄

四年三月唐周廷構等作劉仁贍表來降

實錄時仁贍
卧疾已亟遂

翻然納款而城內諸軍萬計皆屏息以聽其命又曰仁贍輕財重士法令嚴肅故能以一城之衆連年拒守建其來降而其下無敢竊議者斯亦一時之名將也歐陽史三月仁贍病甚己不知人其副使孫羽詐為仁贍書

以城降世宗命昇仁贍至帳前嘆嗟久之賜以玉帶御馬復使入城養疾是日制曰劉仁贍盡忠所事抗節無虧前代名臣幾人可比予之南伐得爾為多乃拜仁贍檢校太尉兼中書令天平軍節度使仁贍不能受命而卒世宗追封彭城郡王以其子崇讚為懷州刺史李景闇仁贍卒亦贈太師又曰仁贍既殺其子以自明矣豈有垂死而變節者乎今周世宗實錄載仁贍降書蓋其副使孫羽等所為也當世宗時王環為蜀守秦州攻之久不下其後力屈而降世宗頗嗟其忠然止以為大將軍視世宗待二人之薄厚而考其制書乃知仁贍非降者也今從之

五年三月唐主遣兵部侍郎陳覺奉表

十國紀年遣樞密使陳覺奉表

實錄載其表云今遣左諫議大夫兵部侍郎臣陳覺躬聽敕命蓋當時所假之官耳今從之

五月唐主去帝號稱國主用周正朔

世宗實錄薛史顯德二年乙卯十一

月伐淮南唐之保大十三年也三年正月四年二月十月三幸淮南五年戊午三月江北平唐之交泰元年也而江南錄誤以保大十五年事合十四年十五年丁巳改交泰五月去帝號明年乃顯德五年又明年即建隆元年中間實少顯德六年江南錄最為差誤其記李昇復姓亦先一年他事故此不可考按故世宗取淮南年月專以實錄及薛史為据

六年正月唐宋齊丘縊死

江表志齊丘至青陽絕食數日家人亦菜色中使云令公

捐館方始供食家人以絮塞口而卒今從江南錄紀年

資治通鑑考異卷三十